

Bosna i Hercegovina  
Federacija Bosne i Hercegovine  
Kanton Sarajevo  
Općina Ilijaš  
OPĆINSKI NAČELNIK



Bosnia and Hercegovina  
Federation of Bosnia and Hercegovina  
Sarajevo Canton  
Municipality Ilijas  
MUNICIPALITY MAJOR

---

Služba za prostorno uređenje i stambeno-komunalne poslove

## INFORMACIJA

O STANJU U STAMBENO-KOMUNALNOJ OBLASTI, OBNOVI STAMBENOG FONDA I  
KOMUNALNE INFRASTRUKTURE NA PODRUČJU OPŠTINE ILIJAŠ

ILIJAŠ: Decembar 2016. godine

## **I. UVOD**

Programom rada Opštinskog vijeća Ilijaš za 2016. godinu u mjesecu decembru planirano je razmatranje Informacije o stanju u stambeno-komunalnoj oblasti, obnovi stambenog fonda i komunalne infrastrukture na području Opštine Ilijaš /u daljnjem tekstu Informacija/.

Služba za prostorno uređenje i stambeno-komunalne poslove /u daljnjem tekstu Služba/ u čijoj nadležnosti je praćenje stanja u stambenoj oblasti i nekim komunalnim djelatnostima čije obavljanje obezbjeđuje opština i rješavanje u prvostepenom upravnom postupku u tim komunalnim djelatnostima pripremila je tekst Informacije da bi se Opštinsko vijeće upoznalo sa stanjem u ovoj oblasti u 2016. godini.

## **II. STAMBENA OBLAST**

### **II/1. Vraćanje u posjed privremeno napuštenih stanova.**

Zakonom o preuzimanju Zakona o stambenim odnosima /"Službene novine Federacije Bosne i Hercegovine", broj: 11/98, 38/08, 12/99 i 19/99/ vođenje prvostepenog upravnog postupka iz stambene oblasti stavljeno je u nadležnost kantonalnih organa uprave.

Kanton Sarajevo je te poslove stavio u nadležnost Upravi za stambena pitanja koja se sada nalazi u okviru Ministarstva prostornog uređenja, građenja i zaštite okoliša.

Po podacima kojima raspolažemo, po zahtjevu stranaka, /sa područja Opštine Ilijaš/ u toku je postupak za vraćanje u posjed **15** privremeno napuštenih stanova.

Služba /po ovlašćenju Opštinskog načelnika/ zastupa Opštinu u ovim predmetima.

Od tog broja osporen je zahtjev za vraćanje u posjed **11** stanova zbog toga što su ti zahtjevi podneseni po isteku zakonom utvrđenog roka, ili podnosioci zahtjeva nemaju zakonski osnov da im se napušteni stan vrati u posjed /nisu bili članovi porodičnog domaćinstva nosioca stanarskog prava, niti korisnici stana u momentu njegove smrti, ne radi se o uništenom ili oštećenom stanu i slično/.

U toku i ove godine, od strane naprijed navedene Uprave, nije riješen ni jedan predmet. Postupci u ovim predmetima, po našem mišljenju, neopravdano, traju predugo.

Kod Kantonalnog suda u Sarajevu još uvijek su u toku dva upravna spora po tužbama Opštine Ilijaš za poništenje dva rješenja ranijeg Ministarstva stambene politike Kantona Sarajevo kojima su odbijene naše žalbe izjavljene na rješenja Uprave za stambena pitanja kojima je Klemenčić Obradu i Zelinčević Azemini dozvoljeno vraćanje u posjed stanova. Upravni sporovi traju i do tri godine, što je nedopustivo.

### **II/2. Vraćanje na raspolaganje napuštenih stanova za koje nije podnesen zahtjev za vraćanje u posjed.**

Zakonom o vraćanju, dodjeli i prodaji stanova /"Službene novine Federacije BiH," broj: 28/05 i 2/08/ uređeno je vraćanje na raspolaganja stanova na kojima nema povrata /trajno napušteni stanovi od strane nosioca stanarskog prava i članova njegovog porodičnog domaćinstva/, dodjela na korišćenje tih stanova i način njihove prodaje.

Upravi za stambena pitanja Kantona Sarajevo podnesen je zahtjev za vraćanje na raspolaganje 48 stanova vlasništvo Opštine Ilijaš i privatizovanih preduzeća.

Do 01. 12. 2016. godine doneseno je osamnaest rješenja o vraćanju tih stanova.

Sedamnaest stanova je preuzeto u posjed sa sadašnjim privremenim korisnicima.

U ovoj godini Opštini Ilijaš nije vraćen na raspolaganje ni jedan stanova iz kategorije ovih stanova.

### **II/3. Dodjela stanova na korišćenje.**

Služba je i u ovoj godini rješavala zahtjeve za dodjelu na korišćenje stanova kojima, po bilo kom osnovu, raspolaže Opština Ilijaš i zahtjeve za produženje prava privremenog korišćenja stanova licima koja to pravo koriste na osnovu rješenja iz ranijeg perioda.

U naseljenom mjestu Mrakovo sredstvima Ministarstva za ljudska prava i izbjeglice BiH i Opštine Ilijaš izgrađena je stambena zgrada sa četiri 2-S stana koji su dodijeljeni na trajno korišćenje porodicama Romske nacionalnosti koji su stanovali u metalnim kontejnerima na lokalitetu iza pravoslavne crkve u Ilijašu.

Do 01. 12. 2016. godine doneseno je pet rješenja o dodjeli stanova na privremeno korišćenje slijedećim licima: Miler Davorki 1-S stan u Ilijašu u koji je useljena prije nekoliko godina od strane Uprave za stambena pitanja Kantona Sarajevo, Šabanović Ademu garsonjera u Srednjem, ali je odustao od toga, te je dodijeljena na privremeno korišćenje Karavdić Ameli, Alimanović Adnanu 1-S stan u Ilijašu Starom i Alimanović Admiru 2-s stan u Mrakovu. Braća Alimanović su se dogovorila da izvrše zamjenu stanova, te im je to omogućeno.

Po zahjevu privremenih korisnika doneseno je 78 rješenja o produženju prava korišćenja stanova dosadašnjim korisnicima. Pravo privremenog korišćenja stana i dalje se produžava na period od šest mjeseci.

Služba u evidenciji ima cca 160 lica koja traže da im se na korišćenje dodijeli bilo kakav stan. Radi se o licima u stanju potrebe za socijalnim stanovanjem, šehidskim porodicama koje na drugi način još nisu u mogućnosti riješiti stambeno pitanje, RVI, demobilisanim borcima, CŽR i licima iz drugih /uglavnom susjednih/ opština.

Služba je i u prethodnom periodu pratila stambenu situaciju privremenih korisnika stanova u lamelama u Starom Ilijašu. U ovoj godini iz tih stanova nije iselio ni jedan korisnik.

Primjenom odredaba Zakona o vraćanju, dodjeli i prodaji stanova /"Službene novine Federacije BiH", broj: 28/05 i 2/08/ i Odluke o dodjeli stanova na korišćenje /"Sužbene novine Kantona Sarajevo," br. 41/14/ na trajno korišćenje dodijeljena su četiri stana na kojima nema podnesen zahtjev za vraćanje u posjed, a vraćeni su na raspolaganje Opštini Ilijaš.

Stanovi su dodijeljeni slijedećim licima: Dovadžija Sakibi, Jozić Ani, Samardžić Đemili i Omanović Feridu.

### **II/4. Otkup stanova na kojima postoji stanarsko pravo.**

Služba još uvijek radi na poslovima obrade zahtjeva za otkup stanova na kojima postoji stanarsko pravo za koje je Opština nosilac prava raspolaganja /vlasnik stana/, stanova privatizovanih preduzeća i stanova nepoznatih vlasnika. U toku 2016. godine podnesena su tri zahtjeva, a zaključeno je četiri ugovora o otkupu. Dva ugovora su zaključena za stanove koji su trajno napušteni i vraćeni su na raspolaganje Opštini Ilijaš, a dva ugovora odnose se na stanove koji su vraćeni na raspolaganje nosiocima stanarskog prava.

Pet zahtjeva je odbačeno kao nepotpuni zahtjevi.

U obradi se nalaze 16 zahtjeva za otkup stanova.

U svakom od ovih zahtjeva i dalje nedostaje neki od dokaza kojim se dokazuje pravo na otkup stana. Neki od podnosilaca zahtjeva ne pokazuju dovoljno interesa da prilože sve dokaze potrebne za otkup stana.

Finansijskih efekata od prodaje stanova nije bilo jer je otkupna cijena svih stanova plaćena u certifikatima.

### **II/5. Održavanje zajedničkih dijelova zgrada.**

Održavanje zajedničkih dijelova zgrada i upravljanje zgradama na području Kantona Sarajevo uređeno je Zakonom o održavanju zajedničkih dijelova zgrade i upravljanju zgradom /"Službene novine Kantona Sarajevo," broj: 3/12/.

U skupštinskoj proceduri je novi Zakon o upravljanju zajedničkim dijelovima zgrade. Skupština Kantona Sarajevo na sjednici održanoj dana 19. 10. 2016. godine utvrdila je Nacrt Zakona i dat je na javnu raspravu koja će trajati 60 dana.

Zakon o stvarnim pravima /"Službene novine Federacije Bosne i Hercegovine", broj: 66/13 i 100/13/ uredio je neka pitanja iz ove oblasti drugačije u odnosu na Zakon o održavanju zajedničkih dijelova zgrade i upravljanju zgradom.

U nekim zgradama zbog nezainteresovanosti etažnih vlasnika ili etažni vlasnici žive van Bosne i Hercegovine /takvih je znatan broj/ još nisu formirani kućni savjeti, niti je izabran predstavnik etažnih vlasnika ni upravitelj koji bi se brinuo o upravljanju i održavanju zajedničkih dijelova zgrade. Nadležno Ministarstvo ovlašteno je da u takvim zgradama odredi prinudnog upravitelja. U ovoj godini o tome nije donesen ni jedno rješenje.

Mnogi etažni vlasnici i dalje ne shvataju da su zajednički dijelovi zgrada njihova zajednička i nedjeljiva svojina, te da su je dužni održavati. Tek kada nastane neki problem u zgradi aktiviraju se u njegovom rješavanju i traže pomoć. Hitnih intervencija na stambenim zgradama u 2016. godini nije bilo.

Naknada za održavanje zajedničkih dijelova zgrada i upravljanje zgradom je jako niska i iz tih sredstava nije moguće obezbjediti ni minimalna sredstva za ove namjene.

Opština Ilijaš je vlasnik 100 stanova u lamelama u Ilijašu Starom i Mrakovu /izgrađeni poslije rata/ za koje ni u toku ove godine nije određen upravitelj.

Sa korišćenjem stanova u Mrakovu od strane većine Romskih porodica uglavnom smo zadovoljni.

## **II/6. Gradnja novih stanova i obnova postojećeg stambenog fonda.**

U Ilijašu je, nakon 3-4 godine, u toku gradnja stanova u dva stambeno-poslovna objekta kolektivnog stanovanja za tržište što je znak da ova gradnja oživljava i da za kupovinu stanova ima zainteresovanih lica.

Obnova zajedničkih dijelova stambenih zgrada finansira se iz sredstava Ministarstva prostornog uređenja, građenja i zaštite okoliša Kantona Sarajevo i Opštine Ilijaš. Još uvijek se ulažu napor da se saniraju oštećenja nastala ratnim dejstvima i neadekvatnim održavanjem stambenih zgrada. Radi se o štetama za čije otklanjanje su potrebna veća finansijska sredstva. Kao prioritet do sada se radilo na zamjeni dotrajalog i oštećenog krovnog pokrivača i krovne građe, oluka i opšava dimnjaka, da bi se stambene zgrade zaštitile od daljnjeg propadanja. Od tih radova u ovoj godini, zbog nedostatka sredstava nije ništa urađeno.

## **III. KOMUNALNA OBLAST**

Komunalne usluge su poslovi na nivou lokalne zajednice koji su od opšteg /zajedničkog/ i javnog interesa, a koji spadaju u samoupravni djelokrug jedinice lokalne samouprave. Obezbjeđivanje obavljanja komunalnih djelatnosti na području Kantona Sarajevo vrše kanton ili opštine.

Zakonom o komunalnim djelatnostima /"Službene novine Kantona Sarajevo," broj: 14/16 i 43/16 u daljnjem tekstu Zakon/ utvrđene su komunalne djelatnosti individualne i komunalne djelatnosti zajedničke potrošnje, kao i komunalne djelatnosti koje obezbjeđuje Kanton Sarajevo, a koje opštine u njegovom sastavu.

U daljem tekstu osvrnut ćemo se na stanje i probleme u onim komunalnim djelatnostima koje prati ova Služba.

### **III/1. KOMUNALNE DJELATNOSTI INDIVIDUALNE KOMUNALNE POTROŠNJE**

#### **III/1/1. Odvođenje i prečišćavanje otpadnih voda**

Stanje kanalizacionog sistema u Ilijašu, bez obzira na izražene aktivnosti razvoja kanalizacione mreže je još uvijek nije kvalitetno riješeno. U ovoj djelatnosti i dalje je prioritet izgradnja prečištača otpadnih voda /kolektora/, kao i povlačenje kanalizacione linije na potezu Malešićki most-ušće rijeke Misoča čime bi se stvorili uslovi za kvalitetnu odvodnju otpadnih voda iz naselja koja gravitiraju toj liniji.

U posljednjih nekoliko godina sredstvima donatora, Kantona Sarajevo i Opštine Ilijaš izgrađena je kanalizaciona mreža u naseljima Malešići, Vlaškovo, Donja i Gornja Karaula, Čifluk, Ljubnići i Balibegovići, Stari Ilijaš, Mlini, Gornja i Donja Misoča i naselja MZ Mrakovo. Ta mreža je prenesena na upravljanje i održavanje JKP "Vodostan" iz Ilijaša.

U toku ove godine građena je kanalizaciona mreža u Industrijskoj zoni "Luka", Malešićima, Donjoj Luci, Kadarićima i Ljubnićima. Za gradnju kanalizacione mreže u naseljenim mjestima Vlaškovo i Crna Rijeka od strane Opštine Ilijaš obezbjeđen je materijal /cijevi/.

Takođe u toku su aktivnosti za izradu projekta za odvođenje i prečišćavanje otpadnih voda za opštine Vogošća, Ilijaš i Breza.

#### **III/1/2. Prikupljanje i odvoz komunalnog otpada na deponiju.**

Komunalni otpad /kućno smeće/ na području Opštine Ilijaš sada se prikuplja u oko 500 posuda /hajfiša/, prazni se i odvozi na gradsku deponiju u Sarajevo.

Organizovano prikupljanje i odvoz na deponiju kućnog smeća vrši se u slijedećim naseljenim mjestima: Crna Rijeka, Donja Bioča, Donji Čevljanovići, Donji Ivančići, Dedići, Gornja Bioča, Gornji Čevljanovići, Gornji Ivančići, Gajevi, Hadžići, Ilijaš-Grad, Kadarići, Kamenica, Karašnica, Lokve, Luka, Lješevo, Ljubina, Ljubnići, Malešići, Misoča, Mlini, Mrakovo, Novo Naselje, Nišići, Podlugovi, Popovići, Salkanov Han, Sovrle, Srednje, Stari Ilijaš, Vlaškovo i Vrutci.

Iz Ilijaša se odvozi svakodnevno, iz prigradskih naselja tri puta sedmično, a jednom sedmično iz naseljenih mjesta Ljubina, Srednje, Čevljanović, Mrakovo, Salkanov Han, Popovići, Sovrle, Ljubinići, Gajevi, Nišići i Crna Rijeka. Dnevno se na deponiju u Sarajevo, u prosjeku odveze, 23 tone kućnog smeća. Kabasti otpad odvozi se dva puta godišnje po unaprijed utvrđenom rasporedu.

Realizacijom Prijekta odvojenog prikupljanja otpada od strane donatora NVO "SIDA" iz Švedske prošle godine preuzeto je 100 hajfiša za odvojeno /selektivno/ prikupljanje otpada. i Kontejneri su postavljeni na ranije određenim mjestima ili na zelenim otocima koji se još nalaze u fazi gradnje. Realizacijom ovog projekta očekivali smo da će se prikupljanje i odvoz otpada vršiti na kvalitetniji način, ali do toga nije došlo.

Stanje skupljanja i odvoza otpada je zadovoljavajuće, ali treba i dalje raditi na poboljšanju pružanja ove usluge, proširivanju područja sa koga se odvozi otpad na deponiju, kao i plaćanja naknade od strane korisnika, jer je stanje naplate za tu uslugu još uvijek loše.

#### **III/1/3. Odlaganje komunalnog otpada**

Pod ovom komunalnom djelatnošću podrazumjeva se obrađivanje i trajno odlaganje komunalnog otpada na deponiju, otvaranje, saniranje i zatvaranje deponije po posebnim propisima. Sav prikupljeni otpad sa područja Opštine Ilijaš, kako smo naprijed naveli, odvozi se na regionalnu deponiju u Sarajevu gdje se odlaže.

Dnevno se prikupi i na deponiju odveze cca 15-20 tona raznog otpada.

I pored svih napora koji se čine na da se cijelo područje Opštine Ilijaš obuhvati organizovanim skupljanjem i odvozom komunalnog otpada još uvijek ima i divljih deponija. Nesavjesni građani najčešće ih stvaraju u toku noći i u dane vikenda.

### **III/1/4. Obavljanje pogrebnih poslova**

Pitanje ukopa umrlih lica na području opštine Ilijaš riješeno je na duži period izgradnjom groblja "Poda" u naseljenom mjestu Ljubnići, tako da u ovoj djelatnosti sada nemamo izraženih problema. Organizovanje prevoza, sahrana i ukop umrlih lica, na cijelom području opštine Ilijaš, vrši se od strane porodice i drugih srodnika umrlog lica.

Ove usluge pružaju privatna preduzeća ili udruženja građana formirana za obavljanje ove djelatnosti.

U toku ove godine muslimanska groblja u Ilijašu Starom i Ljubnićima su ograđena.

### **III/1/5. Snadbijevanje toplotnom energijom**

Usluge ove komunalne djelatnosti pruža KJKP "Toplane" Sarajevo. Usluge se pružaju za 583 korisnika, od čega 529 su vlasnici ili korisnici stanova, 54 su vlasnici ili korisnici poslovnih objekata, odnosno poslovnih prostora.

Zbog dugovanja za isporučenu toplotnu energiju ili na zahtjev korisnika sa sistema grijanja isključena je 51 stambena jedinica i pet poslovnih prostora.

Ovo Preduzeće je spremno i zainteresovano za priključivanje novih korisnika na sistem daljinskog zagrijavanja i na to treba podsticati vlasnike stanova i poslovnih prostora, da bi se gasila individualna ložišta, a time štitila životna sredina.

U mjesecu maju ove godine JU Kulturno sportski centar i radio Ilijaš iz Ilijaša tražila je da se objekat Sportske dvorane priključi na toplifikacioni sistem. Tom zahtjevu se nije udovoljilo zbog dugovanja koja ta Ustanova ima prema KJKP Toplane.

### **III/1/6. Snadbijevanje prirodnim gasom.**

Usluge snadbijevanja prirodnim gasom na području Opštine Ilijaš pruža KJKP "Sarajevogas" iz Sarajeva. Do sada je izgrađena mreža za priključenje potrošača na gasnu mrežu u Ilijašu, Ilijašu Starom, Misoči, Podlugovima, Lješevu, Kamenica, Industrijskoj zoni Luka i i naselja na dionici Ilijaš-Semizovac.

Prema podacima KJKP "Sarajevogas" na području Opštine Ilijaš, na dan 30. septembar 2016. godine, imamo 186 kupca prirodnog gasa iz kategorije domaćinstva, 27 kupaca iz kategorije mala privreda i tri kupca iz kategorije Industrija i ostali veliki potrošači.

Ovi podaci pokazuju da mali broj korisnika koristi ovaj energent. Koji su to razlozi nije nam poznato, ali pretpostavljamo da su u pitanju visoka cijena opreme i instalacija, cijena i strah od gasa. Pošto se radi o najčistijem energentu treba raditi na tome da se građani stimulišu na njegovo korišćenje odnosno potrošnju, da bi se i ovim štitila životna sredina.

## **III/2. KOMUNALNE DJELATNOSTI ZAJEDNIČKE KOMUNALNE POTROŠNJE**

### **III/2/1. Odvođenje atmosferskih voda**

Atmosferske vode u Ilijašu odvođe se preko uličnih šahtova i kombinovane ulične kanalizacione mreže koji prihvataju te vode i odvođe ih u prirodne vodotoke. Ulični šahtovi i dalje se neredovno čiste, tako da dolazi do njihovog začepljenja, te se oborinske vode razlijevaju po ulicama. Odvojeni sistem odvođenja oborinskih voda ne postoji, te će se i o tome morati razmišljati.

### **III/2/2. Održavanje čistoće na javnim površinama**

Čistoću na javnim površinama u Ilijašu i Podlugovima održava KJKP "Rad" iz Sarajeva RJ "Ilijaš" iz Ilijaša. Svakodnevno se ručno čiste površine koje spadaju u prioritet II, a to su Ulice: Hašima Spahića, Omladinska, 126. Ilijaške brigade, Ivana Franje Jukića, Bogumilska i Kakanjska, tri puta površine obuhvaćene prioritetom III, a to su Ulice Moševićka i Bosanski put, a jednom sedmično površine iz prioriteta V u koji spadaju površine u Novom Naselju, Kadarići, Misoča, Vratuša, Kamenica i Luka. Na ovaj način sedmično se čisti 572500 m<sup>2</sup>

javnih površina. Jednom sedmično se vrši mašinsko čišćenje ulica putem "čistilice" koja očisti 19600 m /dužnih/. Uslugama koje pruža KJKP "Rad" RJ "Ilijaš" i ove godine moramo biti zadovoljni. Građani već reaguju na to da snijeg sa trotoara ulica u Ilijašu niko ne čisti.

### **III/2/3. Održavanje javnih površina**

Javne površine u Ilijašu takođe održava KJKP "Rad" Sarajevo RJ "Ilijaš" iz Ilijaša. Održavanje se svodi samo na postojeće stanje, bez bilo kakvih intervencija. Javne površine u centralnom dijelu Ilijaša održavaju se u zavisnosti od potreba i godišnjeg doba. Ovim je obuhvaćeno održavanje 165807 m<sup>2</sup> ovih površina. Ove površine su dosta devastirane. Još uvijek je dosta parkovskog drveća i ukrasnog žbunja u lošem stanju i neophodno ga je zamijeniti sa novim sadnicama, ali je i to uslovljeno sredstvima. Dosta drveća je visokog rasta i blizu stambenih objekata, te svojim krošnjama zaklanja vidik u stanovima, stvara vlagu, a opalo lišće zadržava se u olucima i ubrzava njihovu koroziju i truljenje, te ih je potrebno sjeći. U toku ove godine KJKP "Park" Sarajevo na dijelu Ulice 126. Ilijaške brigade od raskrsnice sa Ulicom Hašima Spahića do Banovca izvršilo je sadnju cca 30 sadnica ukrasnog drveća japanske trešnje i šljive, a na dijelu saobraćajnice pored Industrijske zone Željezara "Ilijaš" cca 80 sadnica topole. Pored toga postavljeno je cca 30 kanti za sitne otpadke, a postavljeno je i 10 parkovskih klupa. Po ugovoru u narednom periodu potrebno je postaviti još 10 klupa.

### **III/2/4. Privremeno korišćenje javnih površina**

Dijelovi javnih površina u centru Ilijaša ispred ugostiteljskih i trgovinskih radnji u Ulici 126. Ilijaške brigade i Ulici Bosanski put /zanatski centar/, uz plaćanje naknade privremeno se, od strane vlasnika radnji ispred kojih se nalaze, koriste kao ljetnje bašte za pružanje ugostiteljskih usluga i postavljanje tezgi za izlaganje robe za prodaju. Sa većinom tih korisnika i plaćanjem naknade do sada nije bilo problema, osim kašnjenja u plaćanju od strane nekih korisnika.

### **III/2/5. Održavanje grobalja**

K.J.K.P. "Pokop" Sarajevo na području Opštine Ilijaš čisti i održava tri groblja i to: Muslimansko groblje Stari Ilijaš površine 6578 m<sup>2</sup>, Rimokatoličko groblje Podgora 1 /Podlugovi/ površine 1900 m<sup>2</sup> i Pravoslavno groblje Podgora 1 /Podlugovi/ površine 2480 m<sup>2</sup>. Održavanje ovih grobalja je na potrebnom nivou, a sastoji se u košenju trave, čišćenju lišća, čišćenju snijega, obrezivanju grana i ukrasnog grmlja, kao i drugim radovima za kojima se ukaže potreba.

Ovo preduzeće spremno je preuzeti čišćenje i održavanje i drugih grobalja na području naše Opštine, ali je za to potrebno obezbjediti sredstva.

U toku ove godine ograđena su groblja u Ilijašu Starom i LJubnićima.

Održavanje ostalih grobalja uglavnom vrše lica čiji su srodnici ukopani u njima.

### **III/2/6 Dekorisanje**

Komunalnu uslugu dekorisanja na području Kantona Sarajevo obezbjeđuju opštine. Opštinsko vijeće Ilijaš na 41. sjednici održanoj dana 31. maja 2016. godine donijelo je Odluku o dekorisanju koja je objavljena u ("Službenim novinama Kantona Sarajevo", broj: 24/16). Poslove dekorisanja obavljat će JKP "Vodostan" Ilijaš. Potrebno je stvoriti uslove da to Preduzeće može vršiti te poslove. Očekujemo da će Ilijaš u dane budućih praznika biti bar pristojno dekorisan.

## **IV. NAPLATA NAKNADE ZA PRUŽENE KOMUNALNE USLUGE**

Organi lokalne samouprave /Opštinsko vijeće ili Vlada Kantona/ nadležni su za utvrđivanje cijena pojedinih komunalnih usluga. Kod određivanja cijena ovih usluga određuju

se ekonomski neopravdano niske cijene s ciljem zaštite standarda stanovništva /provođenja socijalne politike/ što direktno dovodi do ugrožavanja stanja objekata komunalne infrastrukture, standarda i ostvarenja osnovnih prava zaposlenih u komunalnim preduzećima, zapuštanja i neispravnosti uređaja i objekata, a to prouzrokuje gubitke i smanjenje kvaliteta pruženih usluga.

Procenat naplate usluga odvoza i deponovanja kućnog otpada je još uvijek jako nizak i on je u 2014. godini za domaćinstva iznosio 49 %, a za privredne subjekte 59%, što nije ni blizu zadovoljavajućeg nivoa /podacima za 2016. godinu ne raspolazemo/. Cijene ove komunalne usluge nisu mijenjane od 1997. godine.

Procenat naplate naknade na ime odvođenja otpadnih voda je oko 90%, što u JKP "Vodostan" Ilijaš smatraju zadovoljavajućim.

Procenat naplate za toplotnu energiju koju isporučuje KJKP "Toplane" Sarajevo iznosi 90 %. Skup i spor proces prinudne naplate još više usložnjava ovaj problem. Smatramo da sami korisnici usluga moraju shvatiti da su obavezni plaćati naknadu na ime pruženih komunalnih usluga, a onda i zahtijevati da te usluge budu kvalitetnije.

Činjenica da se komunalne usluge, u većini slučajeva korisnicima, ne mogu uskratiti ide na ruku neplatišama.

## **V. IZGRADNJA INFRASTRUKTURE**

### **V/1. PUTEVI**

#### **1.infrastruktura iz nadležnosti Službe**

U proteklom periodu nastavljene su aktivnosti na unapređenju infrastrukture na području općine Ilijaš: parkinga, rekonstrukciji, asfaltiranju i sanaciji lokalnih puteva, izgradnji fekalnih kanalizacionih mreža i realizaciji malih infrastrukturnih projekata po mjesnim zajednicama, te je u nastavku dat pregled značajnijih projekata.

#### **1. Izgradnja mosta, propusta, parkinga, rekonstrukcija i asfaltiranje lokalnih puteva**

1.Rekonstrukciju i uređenje 4(četiri) parkirališta na području općine Ilijaš (parking kod Općine, parking kod škole "Hašim Spahić", parking na Banovcu iza zgrade A1 i parking kod crkve u Ljubini) u vrijednosti 150.000,00KM. Radove je finansiralo Ministarstvo saobraćaja Kantona Sarajevo. Izvođač radova "Halilović"d.o.o.Ilijaš, a nadzor nad izvođenjem radova "Arting BH"d.o.o.Sarajevo.

2.Priključka lokalnog puta u ulici Žrtava genocida u Srebrenici na regionalni put R-445 u mjestu Gnionica. Radovi finansirani od strane Ministarstvo saobraćaja-Direkcija za puteve Kantona Sarajevo u iznosu od 40.796,76KM, Općina Ilijaš finansira radove u iznosu od 10.000,00KM. Izvođač radova je "Citarprodukt"d.o.o.Visoko-P.J.Ilijaš, a nadzor Zavod za izgradnju Kantona Sarajevo.

3.Rekonstrukciju pružnog prelaza Alića rampa na regionalnom putu R-445 dionica Ilijaš-Podlugovi. Ministarstvo saobraćaja-Direkcija za puteve Kantona Sarajevo finansira radove u iznosu od 330.000,00KM, a općina Ilijaš od 26.940,00KM.

Izvođač radova je "Orman"d.o.o.Kiseljak, a nadzor Zavod za izgradnju Kantona Sarajevo

4. Popločavanje trotoara iz sredstava Općine u ulici 126. brigade u vrijednosti od 51.230,44KM.

5. Asfaltiranje puta iz sredstava općine za Gornje Kadariće u dužini 630m u iznos od 60.437,52KM i proširenje puta kod mosta u Kadarićima u vrijednosti 8.578,69KM.

7. Asfaltiranju puta iz sredstava općine do škole u Ljubnićima u dužini 217,0m u iznosu od 32.487,48KM.

8.Rekonstrukcija i asfaltiranje ulice Polomska u mjestu Podlugovi u dužini 820m u iznosu od 128.579,49KM i izgradanja podzida u istoj ulici u iznosu od 35.526,82KM. Federalno



ministarstvo raseljenih osoba i izbjeglica finansira radove u iznosu od 60.000,00 KM, a Općina Ilijaš 68.579,49KM.

9. Afaltiranju puta iz sredstava Općine u naselju Doci u dužini 800m iznos od 57.414,18KM .

10.Rekonstrukcija lokalnog puta u naselju Doci u dužini 170m u odnosu 3:1, sufinansiranje građana u vrijednosti od 13.930,66KM.

11. Afaltiranje iz sredstava općine dijela puta Salkanov Han-Župča u dužini od 450m u iznosu od 52.045,05KM.

12. Afaltiranje dijela puta iz sredstava općine u naselju Marina-MZ Mrakovo u dužini 250m u iznosu od 18.462,60KM .

13. Afaltiranje puta iz sredstava općine u Luci(put lijevo pored mlina) u dužini od 150m u iznos od 9.746,10KM.

14. Afaltiranje puta iz sredstava općine prema mlinu u Luci u dužini od 260m u iznos od 29.598,66KM.

15.Rekonstrukcija dijela puta Stari Ilijaš-Vlaškovu u dužini 1.800m u vrijednosti 288.384,73KM, finansiran od strane Ministarstvo saobraćaja Kantona Sarajevo i afaltiranje istog puta iz sredstava općine u vrijednosti 296.312,44KM.

16. Afaltiranje puta iz sredstava općine, pješački most na r.Misoči-ulaz mezarje Stari Ilijaš u iznos od 30.222,70KM, afaltiranje pješačke staze naselje Kamenice-OŠ Stari Ilijaš u dužini 250m u vrijednosti 17.394,51KM te izgradnja pristupnog puta do pješačkog mosta i puta od ulaza u mezarje do obale rijeke Misoče u vrijednosti 30.222,70KM

18.Afaltiranje puta iz sredstava općine Lješevo-Lug u dužini 500m u iznos od 43.848,97KM.

19. Rekonstrukcija-asfaltiranje lokalnog puta "u naselju Lješevo dužine 225m u vrijednost od 16.180,08KM. Općina Ilijaš finansira ove radove u iznosu od 10.785,08 KM i grupa građana u iznosu od 5.395,00 KM.

20. Afaltiranje puta iz sredstava općine,u Vukasovićima u dužini 360m u iznos od 26.720,46KM.

Izvođač radova na gore navedenim putnim pravcima je "Halilović"d.o.o.Ilijaš, a nadzora nad izvođenjem radova "Construct projekt"d.o.o.Zavidovići.

21.Afaltiranje puta u naselju Gajevi u dužini 180m u iznosu od14.155,25 KM. . Izvođač radova je "Halilović"d.o.o.Ilijaš, a nadzor nad izvođenjem radova "Arting BH" Sarajevo.

## **2. Sanacija lokalnih makadamskih puteva**

Što se tiče aktivnosti na sanaciji makadamskih puteva u 2016.godini, uglavnom se radilo po zahtjevima MZ, udruženja i grupe građana. Lokacije izvođenja radova su mjesta sanacije kritičnih oštećenja i to : sanacija makadamskog puta naselje Misoča-kamenolom(skretanje za Ravni Nabožić) u vrijednosti 936,00KM, u Bioči u vrijednosti 8.827,65KM, u Koritima u vrijednosti 936,00KM, prema Čemernu u vrijednosti 3.060,72KM, puta Solakovići-Taračin Do-Kruzi-Višnjica u vrijednosti 936,00KM, naselje Kadarići u vrijednosti 8.578,69KM i radovi na nasipanju okretaljke u naselju Gajine u vrijednosti 2.158,65KM.

Izvođač radova je "Halilović"d.o.o.Ilijaš, a nadzora nad izvođenjem radova "Construct projekt"d.o.o.Zavidovići i "Arting BH" Sarajevo.

## **Infrastrukturni projekti po planovima MZ**

1. Izvođenje radova na ograđivanju mezarja "Poda" u Ljubnićima. Izvođač radova je "Braća Karić"d.o.o.Zenica, izvedeni su radovi u vrijednosti 59.434,83 KM, a nadzora nad izvođenjem radova od strane "Construct projekt"d.o.o.Zavidovići.

2. Izvođenje radova na ograđivanju mezarja u Starom Ilijašu Izvođač radova je "Engra"d.o.o Zenica, izvedeni su radovi u vrijednosti 6.976,71KM, a nadzora nad izvođenjem radova od strane "Arting BH"d.o.o.Sarajevo.

3. Izvođenje radova na izgradnji drenaže kod romskih kuća u Mrakovu u vrijednosti 1.072,89KM. Izvođač radova je "Halilović"d.o.o.Ilijaš, a nadzora nad izvođenjem radova od strane "Construct projekt"d.o.o.Zavidovići.

## **V/2 KANALIZACIJA**

### **Izgradnja kanalizacionih mreža**

Završene su aktivnosti na projektima koji su započeti krajem 2015.g. i okonačni u 2016.g. i to:

- 1.MZ Ljubnići, izgradnja fekalne kanalizacione mreže u dužini 386m sa bušenjem ispod autoceste u dužini 37m u naselju Ljubnići.
- 2.MZ Luka, izgradnja fekalne kanalizacione mreže u dužini 376m u naselju Donja Luka.
- 3.MZ Ilijaš Grad, izgradnja fekalne kanalizacione mreže u dužini 402m u naselju Kadarići.

U 2016.godini realizovane su aktivnosti na slijedećim projektima:

- 4.MZ Stari Ilijaš, izgradnja fekalne kanalizacione mreže u dužini 508m u naselju Donja Karaula.
- 5.MZ Luka, dogradnja fekalne kanalizacione mreže u dužini 345m u naselju Donja Luka.
- 6.MZ Luka, dogradnja fekalne i oborinske kanalizacione mreže u ukupnoj dužini 480m u obuhvatu Industrijske zone Luka.
- 7.MZ Ljubnići, dogradnja fekalne kanalizacione mreže u dužini 360m u naselju Radića potok.
- 8.MZ Ljubnići, dogradnja fekalne kanalizacione mreže u dužini 300m u naselju kod škole u Ljubnićima.
- 9.MZ Lješevu, dogradnja fekalne i oborinske kanalizacione mreže u dužini 100m.
- 10.MZ Podlugovi, rekonstrukcija fekalne kanalizacione mreže na potezu Maklen-Ilna u dužini 400m.
- 11.MZ Malešići, dogradnja fekalne kanalizacione mreže u dužini 60m u naselju Malešići, radovi izvedeni u projektu rekonstrukcije regionalnog puta, urađeno je 6. prekopa kroz trup puta regionalnog puta kojim je omogućeno priključenje na kanalizacionu mrežu za objekte između regionalnog puta i autoceste.

---

Izgradnja fekalne i oborinske kanalizacione mreže u dužini 3.754m.

Služba za prostorno uređenje  
i stambeno-komunalne poslove